



皇清誥授朝議大夫安徽池州府知府顯考濬川府

君行述

嗚呼痛哉府君竟棄

不孝玃

等而長逝耶憶自

乙酉遭先祖母劉太恭人之變服闋日府君年

五十有二遂以絕志勲名嘗謂

不孝

等曰人生

祿養藉以娛親吾自壬戌歲出登仕版至今二

十餘年不遑家計雙親既逝筋力將衰敢縻厚

祿致滋隕越以故十六年來優游林下一言一

行爲宗族子弟立法垂型胡天不弔遽降憫凶

創鉅痛深神志憤亂尚何忍偷生視息覩顏八  
世耶惟是府君一生倫義醇備治效章明行已  
涖民卓有梗槩而 不孝 等碌碌無似弗克顯揚  
于萬一深懼府君平生志業湮沒不彰則 不孝  
等之罪滋大用敢茹哀和血敬述崖略以俟  
當代大人先生垂覽焉府君姓魏氏 諱 廷會字雲  
階號濬川世居直隸趙州之柏鄉縣始祖寒臘  
公而下世有隱德至七世祖槐川公 諱 謙吉明  
嘉靖丁酉戊戌鄉會魁授雲南道御史歷陞兵

部右侍郎巡撫山西總督三邊軍務六世祖 諱  
大平廕入太學五世祖 諱 文烜選貢生任河南  
太康縣知縣高祖 諱 揚武恩貢生贈朝議大夫  
曾祖象曼公 諱 嗣多康熙壬子科拔貢生教習  
授湖廣黃陂縣知縣行取戶部湖廣司主事轉  
河南司員外陞工部虞衡司郎中誥授朝議大  
夫與吏部尚書保和殿大學士 諱 裔介謚文毅  
公爲從堂昆弟曾祖母梁氏封恭人祖坦菴公  
諱 燕貽歲貢生候選州同知勅封文林郎以府

君貴晉封朝議大夫祖母梁氏繼祖母何氏陳

氏晉封恭人父懿齋公諱蒼佩廩生雍正五年

舉賢良方正授江南寶山丹陽等縣知縣勅封

文林郎晉封朝議大夫母劉氏勅封孺人晉封

恭人府君懿齋公之次子也府君兄弟四人先

伯父耐村公諱廷覲廩貢生任四川成都府同

知次即府君三叔父汲亭公諱廷龍邑庠生賜

封文林郎河南通許縣知縣四叔父韶亭公諱

廷夔附貢生任江南邳睢河務同知府君天資

英異秉質端凝及就外傳穎慧夙成尤為先祖

父母所鍾愛每言此兒必振吾宗先祖父懿齋

公兩仕江南持正不阿卒被罣誤歸里日清風

滿袖環堵蕭然絕不介意惟以訓課諸子為事

府君與先伯父耐村公習舉子業弱冠時蜚聲

黌序而先祖父督課尤嚴每誡之曰自吾祖吾

父以逮吾身世守清白無美利以遺子孫惟是

書香一脈望爾等似續之其勿怠府君敬聆庭

訓益勵潛修黃卷青燈寒暑罔間為文一稟先

正規繩兼工書法先外祖倩之崔公司鐸無極  
縣送考郡城見府君舉止殊常深加器重遂以  
先慈歸焉乾隆三年戊午應試順天府君時年  
二十六歲榜發中副車交遊戚黨羣以少年獲  
雋爲賀府君終以不得正榜爲歉矢志淬礪銳  
圖進取先祖父顧謂府君曰吾家世受

國恩爾才具可用幸功名有階及吾與爾母精力  
尚健何不亟圖報稱徒役志帖括奚爲乎府君  
勉承嚴訓肄業成均考授直隸州州判乾隆七

年挑選引

見奉

旨發往江蘇着照原銜差遣委用府君束裝就道與  
先伯父耐村公偕往本年九月到江歷經委署  
揚州府同知金壇縣知縣借補嘉定縣縣丞凡  
有檄委皆以小心謹慎爲主誠實幹練辦理裕  
如各憲俱以爲能互相獎藉雖職任閒曹而委  
辦事件殆無虛日十年委署海州所屬之沐陽  
縣知縣沐境地勢卑窪十載九潦經理撫卹在

在非易府君自六月到任相度緩急次第籌畫  
頗稱憲意遂蒙

欽差大學士 高公督憲 尹公撫憲 陳公以人

地相需會摺奏請陞補沐陽縣知縣府君感各  
憲知遇之恩益以地方利弊爲己任濬沐河築  
越堤三年有成民情熙恬兼之雨暘時若歲穀  
屢豐過斯境者幾不知前此爲積敝之區也十  
三年卽委署本州知州州境故荒歉居民恒就  
食於外而地濱鹹鹵鹽梟出沒府君率屬安輯

戶口查禁私販在任一載諸弊肅清本年

大計蒙督憲 黃公撫憲 雅公以卓異正薦十五

年調補吳縣知縣先祖父母迎養來署吳門省

會之區政務殷繁民習矯詐治理酌應戴星而

出漏盡始歸習以爲常且大案疊興迴出臆度

之外有奸僧謀奪方丈手刃其師而匿刀于壁

中者有逐僕引盜入主家塗面行劫者一月之

內兩案踵告人皆危之府君不事矜張細心研

究入寺勘驗時奸僧猶僞爲無事者周旋其間

府君察言觀色心竊疑焉乃散遣從役獨徘徊一室而腥穢發于壁間隨破壁而凶刀見執而訊之僧具引服被盜者一言塗面府君卽喜曰盜可得也令具疏常所出入其家而心懷嫌疑者得僕某姓名遴幹役密偵之具得其交通可疑狀立械之來一訊伏辜未及旬兩案立破此固天道神明孽由自作而要非我府君之洞觀物理旁燭無遺亦何能于情僞糾紛中咄嗟而辨有如斯哉由是而神君之頌洋溢于大江

南北矣其他興學校勸農桑令奢靡之習一返淳樸至今吳下士庶皆感念之十六年

翠華初巡江左一切差務章程俱屬創舉而蘇郡靈巖鄧尉諸名勝俱在縣治

行宮位置御路經營雖委員分任而府君親隨大憲悉心籌計條理秩如無有缺踈亦不至溢費諸上游益雅重府君矣是年冬吾母崔恭人以疾卒于署不孝等尚在幼稚府君一身經理公私交縈心緒如焚年甫四旬鬚髮盡白先祖父母

行述  
見府君形神勞勩每相勸慰府君曰以身奉職  
服勤何敢辭也是時督憲 黃公於江寧

行在帶領引

見奉

旨准其卓異回任候陞而四叔父韶亭公以是年分  
發江蘇題補崑山縣縣丞旋署無錫縣知縣與  
府君同官一郡地界比鄰先祖父往來兩署嘗  
謂人曰嚮吾作宰丹陽矜卹同官轉爲及噬人  
皆代爲不平吾問心無愧處之坦然屈於昔而

伸於今以云報也府君自試用來江遞署州縣  
以及調繁吳縣公私無悞先伯父耐村公勸勩  
之力居多是年亦選授江西新淦縣縣丞府君  
奉先祖父母命以禮聘先繼母蔣恭人十八年  
奉部推陞温州府同知因前署揚州府同知任  
內失察甘泉縣革捕叅匪部議降一級調用奉  
旨該督撫出具考語送部引見卸事後值淮海一帶  
被水冲溢秋末冬初災黎正資撫恤撫憲 莊  
公以府君前任海州熟悉情形專摺奏請暫留



署理海州直隸州知州辦理賑務府君抵任與  
兩屬并委員循行鄉里勘災予賑不濫不遺災  
黎咸相慶曰此固五年前福庇我州之魏公也  
災務告竣請咨赴部吏部帶領引

見奉

旨發往江南仍以同知用其降級之案帶于新任督

憲 尹公撫憲 莊公復奏請借補海州知州

奉

旨着照該督等所請行府君三至海州駕輕就熟士

商戴德吏民懷惠不勞而治次年丁先祖父艱  
扶柩歸里哀毀骨立幾不欲生喘息少定日與  
先伯父耐村公兩叔父汲亭公韶亭公侍先祖  
母劉太恭人朝夕頤養躬奉旨甘孺慕孝友親  
黨皆稱美焉魏氏祖塋在柏鄉縣城南自曾祖  
坦菴公遷居正定已歷四世府君爲先祖父擇  
地營葬遂卜吉于府城東北之南牛屯種樹建  
坊府君獨身任焉宦窳事畢先祖母劉太恭人  
勗府君與伯父耐村公暨四叔父韶亭公日兒

輩宜仰體先志以報効爲急甚勿以我年高坐  
糜歲月我精力尚強一子侍奉足矣府君承命  
赴吳先伯父耐村公捐陞知州赴部候選四叔  
父韶亭公報捐同知奏留江蘇歷署楓橋同知  
借補邳州知州陞補邳睢河務同知三叔父汲  
亭公料理家務旋奉侍先祖母劉太恭人就養  
邳署兩江督憲 尹公於二十四年以府君熟  
悉江省指名奏請留于上下兩江遇有相當缺  
出題補于二十六年借補安徽廣德直隸州知

州廣德地處山僻民情惑于風水每聽堪輿言  
藉先人遺骨以乞福祥甚至挖人墳山盜埋興  
訟又復不惜重費延請訟師互相告訐故案情  
數十年不得結府君反復開導嚴拿訟棍一年  
之後此風漸息二十七年調補六安直隸州知  
州未抵任卽委署鳳陽府知府鳳郡幅幘遼濶  
水旱偏災各屬間有且俗尚悍鬪盜賊竊發惟  
在董率屬吏先事豫防督憲 尹公深知府君  
辦理周詳奏請陞署格於部議仍回六安原任

州境歲辦

貢茶五方雜集最易藏奸府君每於穀雨前嚴飭所屬之英山霍山多設幹役巡查彈壓發價行戶弊絕漏卮商民德之二十九年督憲尹公撫憲託公會摺保薦堪勝知府之任請咨赴部因吳縣任內失察邪教降二級調用吏部帶領引

見奉

旨着帶所降之級仍回原任府君自此愈信功名有

定不可強求幸六安距邳睢甚近與先祖母劉太恭人音信時通藉以少慰陟屺之念先伯父耐村公因知州銓選需時亦告降通判挑發江西借補新城縣知縣地屬兩省同一督憲恭逢三十年

鑾輿三次南巡府君調赴省城總局辦理各項事宜先伯父亦奉調來南同辦江寧差務督憲尹公素稔府君勤勞甲于通省於

駐蹕吳會時適池州府知府缺出面奏以府君陞補

於靈巖山

行在帶領引

見奏對良久詢及先世備陳始末

天顏溫霽特俞督臣所請翼日請

訓又蒙

召對賞賜貢緞貂皮等物誠異數也府君倍加感激

益思報稱

差竣送

駕江北同先伯父耐村公偕至邳睢署省視先祖母  
劉太恭人與四叔父韶亭公斑衣舞彩太恭人

顧而樂之曰兄弟同官聚集一堂人生難得之  
事也住十餘日促赴新任本年五月到池州府  
任池屬爲安省瘠郡逼鄰大江人民凋敝正擬  
相地度俗次第培植甫三閱月而先祖母劉太  
恭人以老恙終于四叔父邳睢廳之官署府君  
在任聞訃匍匐奔喪臘底冒凍扶柩歸里哀毀  
愈甚精力遽衰閉戶不預外事次年四叔父韶  
亭公以瘡疾卒於家十一月繼母蔣恭人亦以  
疾逝府君痛鴈行之失復膺內助之悲服闋卽

以疾具呈本縣懇乞申詳遂不復作出山計矣  
是時府君年方逾五旬豐頤修髯偉軀玉立親  
朋族黨咸相勸駕以爲功名自此不可限量而  
府君急流勇退之志確乎不拔遂以勤儉教家  
耕讀課子十六年來爲政於家惟與親友往還  
絕跡不干公事自念春秋旣高後起乏人遵川  
運例爲不孝雅捐府經歷不孝耀捐卽用知縣  
分發山東試用府君念其初膺民社事有未諳  
於四十二年偕往濟南歷經委署陽穀金鄉縣

知縣題補嘉祥縣知縣凡有地方應辦事務並  
民間詞訟情節府君親爲指授四十四年

聖駕四次南巡回

鑾水路經過嘉祥所屬之長溝

御舟亭曲齒房俱府君選材督造華而不靡不孝耀

一一遵命承辦得免貽悞然府君心力已過勞

矣差竣回家憩息命不孝翥到署四十六年不

孝耀調繁齊河縣知縣齊邑地當孔道差務絡

繹恐有貽悞四月盡府君猶親自來署不孝耀

以公事羈留省城 不孝翦 在署侍奉見府君意

氣恬和精神神矍鑠方謂耄耄可期私心慶慰住

署二十餘日以家間無人急於回里謂 不孝翦

曰署中以肅靜為主齊河缺繁而署內安靜由

任人得當故也不異吾為州縣時吾歸可以放

心矣閏五月初起身 不孝 等叩送道左猶以不

必遠去為諭齊邑距正定六百餘里抵家日猶

差人回署親寫手諭但云路途受暑飲食無味

少加調理自可如常爾等不必計念 不孝 在

家親侍左右見府君年高食減時切憂懼雖多

方醫治飲食不進即寄信到署 不孝翦 延醫星

馳到家府君已卧牀不起形神羸瘦猶斤斤問

署中事此七月初十日也參苓屢進醫禱罔效

至十六日子時溘然長逝彌留之際舉家環侍

府君無一言及家事嗚呼痛哉 不孝 等叩違不

及兩月遂成永訣何天之奪我府君若是之速

耶念我府君當先祖父罷官日家無遺產生齒

漸繁不得已勉承嚴命急於小就服官二十五

年兢兢業業通邑大郡到處皆著循聲迨後先  
伯父耐村公四先叔父韶亭公始嶒嶸仕籍或  
同官一省或分符西江均府君一人開其先也  
十六年家居躬行儉約修祠墓延明師故子姪  
輩得有成就府君一身之所係不綦重哉府君  
生平於家爲完人於世爲廉吏承先啟後制行  
卓卓遠近親族知交莫不聞風敬慕稱爲邦家  
之光顧何期位未躋台輔壽未逮期頤而遽溘  
然長逝使 不孝 等長爲無父之人也嗚呼痛哉

府君生於康熙五十二年十二月十六日酉時  
卒於乾隆四十六年七月十六日子時享年六  
十九歲由副榜就職歷任江南金壇沐陽吳縣  
知縣海州廣德六安直隸州知州安徽鳳陽池  
州府知府兩遇

覃恩將應得

封典

贈先曾祖坦菴公先祖父懿齋公先曾祖母梁恭  
人繼曾祖母何恭人陳恭人先祖母劉恭人例

授朝議大夫我母崔恭人舉賢良方正無極縣人

諭諱 戟來公女先繼母蔣恭人太僕司正卿諱

漣公孫女 科舉人諱 楠公女繼母胡恭人

內閣中書 公女子五長不孝 候選府經

歷娶崔氏歲貢生諱 勗公女次不孝 廩生娶

張氏江南候補通判諱 圻公女繼娶趙氏候選

從九品諱 晁公女三不孝 山東齊河縣知縣

娶徐氏原任安徽壽州知州諱 廷琳公女繼娶

徐氏即元配之胞妹也俱崔恭人出四不孝 翰

監生庶母宋孺人出娶沈氏現任湖南桂陽直

隸州知州諱 名揆公女五不孝 蔣恭人出聘

查氏原任湖南巡撫諱 禮公胞姪女 公女

女二長適候選從九品錢名 郁蔣恭人出次適

太學生范名 光禧庶母宋孺人出孫五長延熙

娶何氏郡廩生 敏生公女次延哲聘張氏

公女不孝 出三茂孫聘王氏監生諱 定愈

公女不孝 出四嘉孫不孝 出五待孫不孝

耀 出曾孫一顯會延熙出不孝 等苦次昏迷



一漏萬畧敘生平梗槩語無倫次伏冀

大人先生俯加採擇賜之銘誄用光泉壤 不孝等

世世子孫感且不朽

奉

翰

繼母命稱哀 不孝孤哀子魏 泣血稽顙謹述

耀

誥授資政大夫總督倉場戶部右侍郎世襲一等輕

車都尉姻年家眷侍生蔣賜榮頓首拜填諱



